

Gienh Saeh Dwgriu Ndeu

一件可笑的事

Daj iq daengz hung, gou guh gvaq haujlai saeh dwgriu, hoeng ndawde miz gienh ndeu hawj gou itcig mbouj rox lumz.

Geiqndaej gou roek bi bihaenx, miz ngoenz ndeu, daxmeh cawx bau mbawcaz he ma, naeuz hawj gou neix heuhguh caz vamaedlaeh, siengj gwn caz seiz cijaeu sien dwk mbawcaz roengz cenj bae, caiq dwk raemx roengz cenj bae cimq, yaepndeu couh cimq ndaej cenj caz rang vamaedlaeh ndeu, baez cimz, feihdah miz di diemz, haemq dwgbak, ndigah mwh gou simnyap seiz cungj aeu gwn amq he, gwn amq he le sikhaek gamjdaengz ndei haujlai. Gou gyaez caz vamaed-

laeh lumj maz nei.

Baez ndeu, daxboh aenvih doxgaiq ra mbouj raen fatheiq, gou siengj, cimq cenj caz vamaedlaeh ndeu hawj daxboh gwn, simcingz de haengdingh ndei hwnjdaeu. Ndigah gou bae ra cenj, hoeng ra bae ra dauq cungj mbouj raen saek aen cenj, baenzlawz guh ne? Gou lwgda baez yaep, sikhaek naemj ok aen cawjeiq he. Gou dawz aen yezsuijbingz daeu, cigciep ndingq mbawcaz roengzbae, yaepyet, gij mbawcaz lumj rox bienq mohsuz nei, baez di baez di bienq hung, yaepndeu couh youq ndaw bingz caenx dwk ndaetfwgfwg, lij miz geij duj vamaedlaeh hai dem. Gou dawz caz

daengz dangqnaej daxboh, daekeiq faengfaeng dwk naeuz: "Daxboh, gou cimq gij caz neix, mwngz gwn amq ndeu, baujingq mwngz heiq siu." Daxboh ciep aeu aen cenj, baez yawj, cam: "Mwngz vihmaz dwk baenzlai mbawcaz, caen yaix ha!" Gou naeuz: "Gou hix mbouj siengj yaix, hoeng gou dauqcawq ra cenj mbouj raen, couh cigciep ndingq mbawcaz roengz bingz bae lo." Gou caengz gangj sat, daxboh gaenq riuha hwnjdaeu, ciep dwk de lwnh hawj daxmeh, daxmeh youh lwnh hawj daxgoeng daxbuz. Couh yiengh-neix, boux cienz boux, sawqmwh daengx aen ranz cungj rim singriu.

(Maj Huj)



goj lwgnyez

Roeggacak Angq Bang Bouxwnq

助人为乐的喜鹊

Seizcin daeu seiz, roeggacak youq gwnz go faex cieq hungsang ndeu caux aen rongz ndeu, aen rongz de youh sang youh hung, youh gengmaenh youh gyaunde, daihgya cungj hozhaenz dangqmaz, bouxbou haenh gij dinfwngz de ndei raixcaix.

Roeggacak haeu ranzmoq bae youq le, youh mbin okbae gamz nyefaex ma gyaq youq gwnz nye faex sang henzgyawj bae, de lij aeu caux rongz dem. Roeglaej mbin gvaqdaeu, naeuz: "Roeggacak dahcej, aen rongz mwngz gaenq cieq hungsang cieq lengj lo, mwngz vihmaz lij guh rongz dem ne?" Roeggacak riunyumnyum naeuz: "Lai guh aen rongz ndei ha."

Rongz moq guh ndei le, roeggacak lij caengz dingz roengzdaeu, youh caiq guh rongz moq. Roegga caiq hix yawj mbouj gvaq da lo, mbin gvaqdaeu, naeuz: "Dou cungj rox mwngz guh rongz ak lo, mwngz lij aen youh aen guh baenzlai rongz miz maz yungh, baij aeunaj ma?"

Roeggacak cij riuriu, naeuz: "Lai guh aen rongz ndei ha."

Yienghneix, roeggacak guh le geij aen rongz, aenaen cungj hungsang gengmaenh youh gyaunde, caeuq aen rongz swheij youq haenx mbouj miz gijmaz mbouj doengz.

Seizdoeng daeu lo, rumzbaek cihuhu.

Ngoenz ndeu, aen rongz roegga deng rumz ci vaih doek roengzdaeu lo. Roegga nit dwk saenzdedded, de ngiengx gyauej yawj giz mbouj gyae, gij rongz roeggacak lij lumj gungdienh nei gengmaenh gyaunde, de geijlai siengj bae gizhaenx baexbaex rumz ndojndoj nit ha, hoeng, baez ngeix daengz swheij gaenq riu gvaq roeggacak, couh mbouj ndei eiqsei hwnjdaeu lo. De cijndei ndwn youq gwnz nyefaex, suknyaennyaen cengqgengz dingj dwk. Raq rumz nit ndeu ci daeu, roegga nyaenx mbouj ndaej "a" swenj sing ndeu.

Roeggacak ndoj youq ndaw rongz hunggvangq raeurub, sawqmwh dingqny roegga swenj ndaej siliengz, de ndonj okdaeu yawj, raen roegga ndwn youq gizhaenx saenzdedded, couh mbin gvaqdaeu, bongx mbaq roegga naeuz: "Nit ba? Cingj haeu ndaw rongz hoengq gou daeu ndojndoj ba."

Roegga dauqdaej miz rongz youq lo, lij dwg caeuq roeggacak ityiengh youq aen rongz youh hung youh gyaunde ne. Roegga gikdoengh dwk doiq roeggacak naeuz: "Docih mwngz, roeggacak dahnuegx."

Seizdoeng gvaqbae, seizcin daeu, haujlai roeg daj gizgyae mbin dauqma lo. Gyoengqde hainduj caux rongz, yaek faeg roeglwg.

Roegdingheng mbouj sug caux rongz, seizgan ngoenz youh ngoenz gvaqbae le, aen rongz de lij caengz caux ndei, da raen couh mbouj ndaej faeg roeglwg lo, de gip ndaej baenqlulu, saetmuengh dwk hemq: "Mbouj guh, mbouj guh lo!" Roeggacak mbin gvaqdaeu, nai de naeuz: "Mwngz sien gag guh gong, saedcaih guh mbouj baenz couh haeu ndaw aen rongz hoengq gou bae faeg lwg ba."

Roeggacak youhcai guh rongz moq lo, de lij aeu guh haujlai aen rongz dem, hawj engq lai doengzdoi cungj miz rongz daeu dangj rumz gang fwn caeuq faeg lwg.

Roeggacak caen angq bang bouxwnq ha.

(Ganh Sozvwngz/甘说文)



Boux Caemhnaengh Gou

我的同桌

Gou doeg daengz seiq nienzgaep lo, moix aen haggeiz caemhnaengh cungj deng vuenh, gyoengq caemhnaengh gou gak boux gag miz daegdiemj. Boux caeuq gou caemhnaengh hagsib seiz ndaej doxbang, roengzdangz le ndaej guh baengzyoux ndei. Hoeng aen haggeiz neix boux caemhnaengh gou dwg dah he. Gangj daeu caen dingjilingz, gou caeuq de lumj miz caeuz nei.

Dah caemhnaengh neix maj ndaej seuqsetset, lwgda ndongqliklik, bak de iqetet hoengzfedfed. Hoeng de miz di leixhaih. Ei, gou ngoenzlaeng aeu nyaenxsouh boux baksoem neix lo.

Song dou miz diuz bien' gyaiq he, byawz gamj hamj gvaq gyaiq, couh cuij lo, song dou cungj gig haeujsim.

Miz baez ndeu, gou bungz diuz suyoze he mbouj rox guh, couh cam gyoengq doengzhag seiq henz, byawz rox gyoengqde hix mbouj rox guh. Mbouj miz banhfap, gou cij ndaej cam de, mbouj siengj daengz de gingqyienz mbouj leixlangh gou, lienz daezmoeg cungj mbouj yawj, lij naeuz: "Gou cungj vunzhuk neix baenzlawz rox guh gij daezmoeg diencaiz cij rox guh neix?" Hw, bak de baenzneix gangj, hoeng rou yawjraen bonj bouh de sij baenz benq, gou couh rox de dwg yaeuh gou caemhcai gangj bemx gou. Gou caen siengj fanj naeuz de can he, hoeng youh lau de bak engq soem, ndigah gou mboujcai nyex de.

Boux vunz mbouj dwg yienghyienh cungj hawj vunz dwgcaengz, de hix miz giz ndei, couhdwg de sij cih daegbied ndei, gij cozyez de sij ndaej cingjingj caezcaez.

Mbangj boux caemhnaengh youq gwnz hagsib ndaej guh doi ndei, mbangj boux baenz baengzyoux ndei, boux caemhnaengh baksoem neix yaek ciengxlwenx louz youq ndawsim gou.

(Cau Huj)

